

INUIT ATAQATIGIIT INATSISARTUNI



UPA2024/60

23-04-2024

Pipaluk Lynge

Isumaginninnermi, ilinniartitaarnermi peqqinnissamillu isumaginnittoqarfiit silassorissuusiaq atorlugu sullissisinaanerannut Inatsisartut isumaat takorluugaallu pillugit apeqquteqaat aallaavigalugu oqallisissiaq.

(Inatsisartunut ilaasortaq Asii Chemnitz Narup, Inuit Ataqatigiit)

Oqaaseqaat:

Inuit Ataqatigiinniit isumaqarpugut silassorissuusiaq sorpassuartigut iluaquteqartut, ineriartupiloornerallu qanimut malinnaavigissallugu pingaaruteqartoq.

Sunaluunniit inuup sanaava ineriartortitaalu ajunngitsortaqarlunilu ajoquteqarpoq. Silassorissuusialli nassatai isornartorsiortariaqarigut Inuit Ataqatigiinniit isumaqarpugut.

Silassorissuusiap kialluunniit isikkua nipaalu issualersinnaalersimavai allaat politikikkut siuttut aamma salloqittaavigineqartalersimallutik deep fakemik taasartagaannik ingerlanneqartumik, aammalu erinarsortartut tusaamasallu nipaata atorlugit erinarsortinneqarsinnaalernikuullutik.

Silassorissuusiap ineriartortitaanera, susinnaanera, qanorlu kinguneqarsinnaaneri eqqumaffigisariaqaratsigit, qaammarsaassutigineqartariaqartut Inuit Ataqatigiinniit isumaqarpugut.

Silassorissuusiap pisinnaasai aarleqqutaalu pillugit ataatsimiititaliami saqqummiivigineqaratta, ilaatigut tikkuartorneqarpoq inuiaqatigiinnit eqqumaffiginnginneqarnerujussua, ullummi tamaasa inuunitsinnut tunngasunik silassorissuusiap atorsinnaasaanik inuit naapeqatigiittarfiatigut ikkussuivugut, inuunitsinnut paasissutissarpassuarnik; kina, kikkut, sumi, qangalu ilaginerlugit malinnaasitsigatta, ilaatigut eqqumaffigineqalersimavoq meeqqatta assinganik videonillu inuit naapeqatigiittarfiisigut ikkussuunitsinni, meeqqatta nipaata, isikkuisalu silassorissuusiap atorlualersinnaaneri eqqumaffigeqquneqalersimallutik.

Inuit Ataqatigiinniit taamak siullermik oqareerluta, isumaqarpugut silassorissuusiap ilinniartitaanikkut, isumaginninnermi peqqinnissamillu isumaginnittoqarfinni atorsinnaanera periarfissanik ammaasoq aammalu piffissamik atorluaalersitsisoq, taamaattorli oqareernittuut

INUIT ATAQATIGIIT INATSIARTUNI



ajoqutai ajunnequtaalu aamma isiginiartariaqarpagut. Ineriartupiloorneranimi malinnaasinnaajunnaalereerpugut.

Silassorissuusiaq pillugu nunani tamalaani inatsisiliorsimaleraangamik, silassorissuusiaq ineriartupiluungaarmat, inatsit naammassineqaraangat nutaanngilereersimasarpoq.

Allannguinermi ineriartornermilu allorinarnerni pitsaasut pitsaannginnerillu oqimaalutartariaqartut, Inuit Ataqatigiinniit isumaqarpugut.

Aaliangersimatilluta silassorissuusiaq atulerniarlugu, taava aamma inuit suliffissaat, ulluinnarnilu inuuneranni silassorissuusiap atornerulernerani atukkatta ajorseriannginnissaat, qulakkeertariaqaripput Inuit Ataqatigiinniit isumaqarpugut. Taamaattumik silassorissuusiap atornerata kingunissai qulaajarneqartariaqarput, sumullu saalernerluta tamatta ilisimasariaqaripput Inuit Ataqatigiinniit isumaqarpugut, tamannalu pissappat ilaatigut qaammarsaaneq aqutissaasoq isumaqarpugut.

Deep fake siunissami nittartakkani asseq sorleq salluliuutaanersoq, asserlu sorleq piviusuunersoq nalornileratarsinnaagatsigu, nittartakkatigut takusatta upperinassusaat qulakkeersinnaajunnaaratatarsinnaagigut eqqumaffigineqarpoq. Taamaattumik AI-ip atornerani susinnaanersoq eqqumaffigeqqissaartariaqarparput, avaqqussinnaajunnaarsimagatsigu.

Taamaattumik Naalackersuisut innuttaasut toqqissisimanerat qulakkeerniarunikku, sillimmasernerusariaqarput, sumullu atorsinnaanera kisiat isiginiarnagu, suulli nassatarisinaanera Inuit Ataqatigiinniit isiginiarpuq.